

二・二八事件 15 週年特集
 原文刊 tī 台灣青年第 15 號 (Feb.1962)
 台語翻譯：嬰孫

(第三部)

11 位犧牲者 ê 經歷

本刊第 6 號「二・二八特集號」有刊 47 位「Hông 掠去 ê 出名人名單」。In ê 家族暝日過傷心 ê 日子，無人知影 in ê 背景。好佳哉本社 tī 神田舊冊店 chhoē 著 1943 年 (昭和 18 年)3 月 15 日，興南報社(台北市末廣町 5 之 8 號)有出刊呂靈石編 ê 「台灣人士鑑」。彼本冊內面有記載 11 位犧牲者 ê 經歷，下面 beh 來介紹這 11 位 ê 犧牲者。

林茂生(正四位勳四等)

台南高等工業學校囑託，台南市大正町 2 丁目

1887 年 (明治 20 年)10 月 29 日 tī 台南市清水町出世。伊是台灣南部基督教長老林燕臣 ê 大孝生，日本第三高等學校畢業，1916 年(大正 5 年)讀完東京帝國大學哲學科。伊是台灣第一個文學士(大學畢業)，畢業了轉來台灣擔任台南長老教中學教務主任。1918 年(大正 7 年)兼任台南師範囑託、台南商業專門學校教授 kap 台南高等商業學校教授。1923 年(大正 12 年)至 1927 年(昭和 2 年)主持私立台南長老教中學創立基金 ê 募款。1927 年(昭和 2 年)hō 台灣總督府派去英國 kap 美國留學。1928 年(昭和 3 年)6 月完成美國哥倫比亞大學碩士學位。1929 年(昭和 4 年)台南高等商業學校 chham 台北高等商業學校合併，伊擔任台北高等商業學校教授。全彼年 11 月 thèh 著美國哥倫比亞大學哲學博士學位。1930 年(昭和 5 年)1 月轉來台灣，擔任台南高等工業學校教授 kap 英德語科主任兼圖書課長。伊拍拚培養工程師人材，1941 年(昭和 16 年)升勅任官(天皇派任 ê 官)，了後退官擔任台南師範囑託 kap 台南工業學校囑託。伊的興趣：寫毛筆、圍圍棋、象棋 kap 網球。

伊 ê 家庭：父林燕臣，基督教會牧師(84 歲)、母林郭氏寬(79 歲)，某王氏採繁(36 歲)，生有 5 男 1 女。

王添丁

文山茶行常務董事，文山製茶股份公司常務董事，台灣茶出口公司常務董事，
 台北市港町 1 之 15

1901 年(明治 34 年)6 月 24 日 tī 文山郡新店庄出世。1920 年(大正 9 年)到 1929 年(昭和 4 年)新店庄公所庶務主任，路尾調去台北市政府社會課，辭職後參加全島皇漢醫道復活運動 kap 台灣地方自治聯盟運動。1931 年(昭和 6 年)開始經營事業，開文山茶行，總公司

設 tī 台北市港町，分公司設 tī 大連、沖繩、星加坡，出口茶米。伊 mā 是茶商公會 ê 評議員，台灣茶米出口滿州中國公會 ê 評議員，廈門福建茶業公司監查人 kap 港町第 1 區區長。伊對看冊有興趣。

伊 ê 家庭：母王許氏有，伊 chham 伊 ê 某生 2 男 4 女，大孝生台北二中畢業，兄王水柳，弟進堂(日本大學畢業)，弟忠信(昭和醫專畢業)。

陳忻

大東信託股份公司常務董事，皇民奉公會台中州支部生活部長，台中商工會副會長，台中市初音町 1 之 5

1893 年(明治 26 年) 12 月 7 日 tī 大甲出世。1921 年(大正 10 年) 4 月東京慶應大學理財科畢業。1925 年(大正 14 年) 美國哥倫比亞大學畢業。1926 年 (昭和 1 年) 12 月担任大東信託股份公司常務董事。

1930 年 (昭和 5 年) hông 派作台中州協議會員，1941 年(昭和 16 年) 6 月 hông 派作台中州皇民奉公會中央本部委員 kap 皇民奉公會台中州支部生活部長。全彼年 10 月 hông 派作臨時台灣經濟審議會委員。1942 年(昭和 17 年) 4 月 hông 派作台中商工會副會長。伊對看冊有興趣。伊 ê 家庭：某吻，生 2 男 5 女。

林連宗

律師，台中市大正町 6 之 1

1905 年(明治 38 年) 4 月 7 日 tī 彰化出世。1923 年 (大正 12 年) 3 月台中一中畢業。1925 年(大正 14 年) 中央大學預科。1930 年(昭和 5 年) 2 年級 ê 時陣參加高等文官考試，行政科 kap 司法科及格。1931 年(昭和 6 年) 3 月轉來台灣，開業律師兼台灣新聞社顧問。伊對看冊有興趣。

吳鴻麒

律師，台北市建成町 1 之 92

新竹州吳榮棣 ê 第 2 孝生。1902 年(明治 35 年)4 月 7 日 tī 中歷街出世。伊讀上海協和大學，1930 年 (昭和 5 年)日本大學法科畢業，高等文官考試及格。1932 年(昭和 7 年) 開業作律師兼台北律師會副會長。

李仁貴

御成軒頭家，南邦電氣工業股份公司董事長，廣福洋行頭家，台北水果商會理事，台北市御成町 3 之 17

1901 年 (明治 34 年) 11 月 28 日 tī 台北州新莊郡出世。1915 年(大正 4 年)和尚公學校畢業。1931 年(昭和 6 年) tī 台北市御成町經營御成軒作頭家。1933 年(昭和 8 年) 作台北水果商會理事，隔轉年作台北獸肉商會理事。1935 年(昭和 10 年) 作台北商工協會理事。1939 年(昭和 14 年) 開廣福洋行作頭家。1941 年(昭和 16 年) 兼作台北警察署御成聯合壯丁團長 kap 創立南邦電氣工業股份公司作董事長。另外 mā 有兼作台灣自給肥料股份公司監察員。伊 ê 家庭：某李陳氏根枝，生 4 男 4 女，小弟宗發。

李瑞漢

台北市會議員，律師，辦理師，台北市永樂町

1906 年 (明治 39 年) 11 月 28 日 tī 新竹州竹南庄出世。1928 年(昭和 3 年) 辦理師考試及格。1929 年 (昭和 4 年) 3 月中央大學法科畢業，全彼年 11 月高等文官司法科考試及格，tī 東京見習律師。1931 年(昭和 6 年)8 月 tī 台北市永樂町開業作律師。1938 年 (昭和 13 年) 4 月 hông 選作台北市律師公會副會長。

伊 ê 家庭：小弟李瑞峯，1940 年(昭和 15 年)中央大學畢業，(全款 hông 拍死)。

施江南(從七位，醫學博士)

台北州會議員，四方醫院院長，台北市建成町 1 之 229

1902 年 (明治 35 年) 12 月 14 日 tī 彰化郡鹿港街海埔厝 461 番地出世。1925 年(大正 14 年) 3 月日本醫學專門學校畢業。全彼年 4 月入學京都帝大醫學部專修科，專門研究內科。1930 年 (昭和 5 年) tī 市立京都病院服務，擔任京都市囑託醫，全彼年 9 月教授會批准伊 ê 博士論文，得著醫學博士。隔轉年(昭和 6 年) hông 派去京都帝大附屬病院作副手，tī 內科服務。1931 年 (昭和 6 年) 4 月兼任台北醫學專門學校講師 kap 兼日本赤十字台灣支部醫院囑託。1935 年 (昭和 10 年) 4 月 hông 派作台北醫學專門學校教授，彼年 7 月申請辭職，四方醫院開業，看內科 kap 小兒科病人。1940 年 (昭和 15 年) 11 月 hông 派作台北州會議員。1941 年 (昭和 16 年) 6 月 hông 派作皇民奉公會中央本部參事。1942 年 (昭和 17 年) 1 月 hông 派作奉公醫師本部理事。

伊 ê 家庭：母施陳氏謹(70)，大兄施江東(46)，二兄施江西(44)，弟施江北(36)，某施陳氏焦桐，長女施氏玲玉，次女施淑娟，三女郁子。

吳金練**興南新聞政治部次長兼論說委員，台北市下奎町 2 之 3**

1913 年 (大正 2 年) 3 月 4 日 tī 台北市出世，台北師範畢業。1934 年(昭和 9 年)東京文化學院文學部畢業。彼年 9 月 tī 台灣新民報，台南支局服務 hōng 調去蘭陽支局。1939 年(昭和 14 年) hōng 調去本社。伊對看冊 kap 旅行有興趣。

伊 ê 家庭：某黃氏天賜，大孝生茂宏，長女美津子，次女美智子，三女美佐子。

阮朝日**興南新聞社監事，台灣瓦斯發生爐股份公司董事長，台北市三橋町 2**

1900 年 (明治 33 年) 7 月 6 日 tī 高雄州林邊庄竹子脚出世，阮鴻儒 ê 第 3 孝生。東京高輪中學就學。1926 年(大正 15 年) 3 月福島高等商業學校畢業。轉來台灣擔任長福商事股份公司董事長，屏東信託份公司董事長。1932 年 (昭和 7 年) 3 月屏東信託份公司董事長辭職，擔任台灣新民報社販賣部長。隔轉年 1933 年 (昭和 8 年) 12 月兼代理會計部長。1937 年 (昭和 12 年) 4 月升會計部長兼印刷部長。1939 年 (昭和 14 年) 1 月 hōng 調作監事。彼年 10 月興南新聞社監事辭職，開台灣瓦斯發生爐股份公司作董事長。1941 年(昭和 16 年) 1 月 koh 再 hōng 選作興南新聞社監事。伊對集郵票有興趣。

伊 ê 家庭：某阮林氏素，1908 年(明治 41 年)台南第二高女畢業，大孝生榮一，二孝生榮二，三孝生家榮，長女美珠，次女美妹。

廖進平(號一星)**廣福洋行董事長，南邦電氣工業公司監事，台北市御成町 3 之 17**

1895 年 (明治 28 年) 7 月 17 日 tī 台中州大屯郡西屯庄出世。公學校畢業入去總督府農事試驗所食頭路，1916 年 (大正 5 年) 2 月作胡蘆墩書記，昇胡蘆墩教育會評議員。開藤細工廠，產品參加 tī 各所在開辦 ê 全國博覽會，得著十幾個金牌 kap 銀牌。1920 年 (大正 9 年) 參加福岡工業博覽會，皇太子買伊 ê 產品。續落來伊作神岡庄協議員，青年團分團長，台灣物產罐頭公司董事長，台灣圖書出版公司監事，儀禮革新社代表理事，豐原總工友會顧問，台灣民衆黨台中市部幹事，台灣民衆黨中央常務委員會宣傳部長，豐原信用組合監事。1932 年 (昭和 7 年) 服務台灣新民報社。1938 年(昭和 13 年)台灣新民報社辭職。1939 年 (昭和 14 年) 開廣福洋行作董事長。1941 年(昭和 16 年)11 月開南邦電氣工業公司作監事。伊對看冊、看電影 kap peh 山有興趣。

伊 ê 家庭：老母陳氏鼻(72)，某邁(48)，大孝生德政(24)，二孝生德潛(22)，三孝生德雄(16)，四孝生德北(11)，長女菊子(21)，二女鴛鴦(19)，三女秀雪(14)。

台灣民主自治同盟 ê 滅絕

章漫龍

謝雪紅干單因爲「思想改造」，叫是 tō 會 tàng 放伊自由，後來聽人講已經 hông 刑死罪。聽著真心酸。滿州國皇帝溥儀 kap 國民黨拍拚 beh 滅絕共產黨 ê 杜聿明攏會 tàng 受著共產黨 ê 赦免恢復自由，是按怎 30 外冬 ê 老共產黨員謝雪紅 ê 生命應該死，理由 tī 刁位？

彼個原因 tō 是謝雪紅並 m̄ 是中國人，mā m̄ 是滿州人，tō 是伊是台灣人。中共可能判斷若是放溥儀 kap 杜聿明 hō in 活，會 tàng 作宣傳，m̄-kú 中共可能認爲若是放謝雪紅活，對台灣人 m̄-niā 無宣傳作用，顛倒有歹 ê 所在。

中共處刑謝雪紅，in 家已拍斷 beh 靠台灣人鬥脚手「解放台灣」ê 希望。若是中共爲著台灣人 ê 幸福 beh 解放台灣，謝雪紅 kap 伊領導 ê 台灣民主自治同盟（簡單稱呼台盟）是非常優秀 ê 協力者 kap 不止仔好 ê 地下組織。台盟 ê 組織大 koh 再有久長 ê 歷史。謝雪紅 kap 台盟 m̄-niā 有表示 beh 協力中共，謝雪紅就是爲著 beh 證明，所以家已走去倚中共。

M̄-kú 1958 年 ê 春天，謝雪紅 hông 清算，事實上台盟 mā toè 滅絕。詳細 ê 經過已經有刊 tī 本刊第 6 號「謝雪紅 ê 教訓」。雖然台盟 ê 名猶有 teh 存在，每擺若遇著有節目 ê 時陣，總是有無名 ê 黑卒仔代表台盟讀台盟 ê 聲明書，he 根本是中共偽造 ê 台盟。M̄-kú 中共對 in 家已偽造 ê 台盟親象 mā 無期待會 tàng 發生啥物作用。

Koh 再講，東京有一陣有共產思想 ê 台灣人，基本上 in chham 謝雪紅 kap 台盟無全款。這陣人認定 in 是中國人，但是謝雪紅 kap 台盟卻認爲家已是台灣人，而且認到底。這陣人 tōa tī 資本主義社會 ê 日本享受物質文明，開嘴 tō phō 共產主義。In 對解放台灣會 tàng 貢獻外 chē，中共上蓋清楚。In koh-khah 按怎表現 beh 作中國人，中共照常 kā in 當作台灣人。中國人 ê 特性是若遇著對全故鄉出身 ê 人，in tō 會真好鬥陣，而且會互相照顧。可惜謝雪紅 kap 台盟抑是東京彼陣有共產思想 ê 人，chham 中共 khiā 頭 ê 人無同鄉關係。所以平平攏是台灣人，中共當然會 kā 謝雪紅 kap 台盟 ê 人評估作比較 khah 有價值鬥陣。

M̄-kú 中共姑不將 tō ài 清算謝雪紅 kap 台盟，爲啥物理由中共 ài 按呢作？彼個原因用簡單一句話來講 tō 是謝雪紅 kap 台盟堅持台灣人 tī 台灣是上蓋優先，無 beh 讓。中共想 beh 解放台灣，若是 in 對台灣 kap 台灣人有正確 ê 認識，in 一定會 tàng 接受謝雪紅 kap 台盟 ê 主張。其實照公平講，中共 ê 「解放台灣」需要採用謝雪紅 ê 理想才會成功。

萬不幸，中共 beh 解放台灣 ê 目的並 m̄ 是為著台灣人 ê 幸福。會使得講，in 只是有帝國主義 ê 野心，干單 beh 得著台灣經濟 kap 軍事方面 ê 利益。中共無問 900 萬人台灣人 ê 意見，就直接 kap 國民黨交涉，chham 清算謝雪紅 kap 台盟 ê 事實，tō 會 tàng 證明中共 ê 野心。

大部分 ê 台灣人有一段時間 hō 中共 ê 宣傳「為著 beh 解放 hông 剝奪 ê 階級，代先 ài 拍贏，贏了才採取民主政治」迷著。Tī 這中間有一陣台灣人有覺醒，in 認為中共 ê 落伍會影響著台灣，mā 認為中國人 chham 台灣人互相 bē-tàng 信任是運命，所以有台灣人主張台灣獨立。M̄-kú 台灣民衆 ê 意向猶未堅定，koh 欠國際上 ê 支持，所以先覺者 ê 主張經過十外冬，才有得著民眾 ê 了解。

謝雪紅 kap 台盟眠夢中國是好國家 kap 中國人是好人，才會拚生死 mā beh kā 所有 ê 政治命運倚對中國。Tō ài 到伊受害了才證明伊 ê 認識 kap 判斷是錯誤 ê。Tī 彼當時 ê 環境，in ê 選擇可能有道理，至少 in 有勇氣敢 kā 上蓋適合台灣 ê 政治制度講 hō 中共聽，in mā 有勇敢採取行動。

1947 年(二·二八事件彼年)11 月 12 日台盟發表 18 條政策，這個政策會 tàng 代表 in ê 主張。

1. 建立民主聯合政府，建設獨立、平和、民主、富強、康樂 ê 新中國。
2. 保障人民身體、行動、住所、旅行、思想、信仰、言論、出版、通信、集會、kap 結社 ê 基本自由。
3. 以省為地方自治上蓋 kōan ê 行政組織，省 kap 中央 ê 權互相分配平均，各省家己定家己 ê 憲法，選家己 ê 省長。
4. 台灣省實行地方自治，省長、縣長、市長、區長、鎮長 kap 鄉長攏 ài 由人民直選。
5. 省設省議會，縣設縣議會，市設市議會，省縣市議會是執行人民權利 ê 代表機關。
6. 實行選舉制度。人民 ê 選舉權 bē 受著財產、教育、信仰、性別 kap 種族 ê 限制。廢止選民 ê 公民宣誓登記 kap 覆審候選人 ê 制度。
7. 司法完全獨立，行政 bē-tàng 受著軍事 ê 干涉。廢止政治警察、經濟警察、秘密警察 kap 特務組織。
8. 中國 ê 領土 kap 領海 bē-tàng hō 外國 ê 軍隊駐兵。
9. 反對帝國主義侵略，實行獨立自主 ê 外交。
10. 保障人民生存權、勞動權 kap 營業權。
11. 發展民族資本 ê 工商業，廢止一切統制經濟制度。
12. 實行 8 小時勞動時間，保障作工人團體交涉、罷工 kap 怠工 ê 權利。
13. 實行「耕者有其田」作土地改革 ê 基本原則。
14. 廢止一切雜稅，實行統一所得累進稅。

15. 原住民族一律平等，會 tàng 組織自治單位。
16. 保障學術研究 ê 自由，實行義務教育。
17. 保障女性經濟、政治、法律、社會上絕對平等。
18. 設破病、老人、殘廢、失業、孤兒 kap 散赤人救濟機關。

發表 18 條政策彼日成立「台灣民主自治同盟籌備會」。Tú 好二・二八事件發生無外久，台灣人精神上受著真大打擊 ê 時陣，想 bē 到「台灣民主自治同盟籌備會」會發表下面這款反動色彩 ê 政治要求，真可貴。

1. 拍倒獨裁專制，實行人民民主制度！
2. 人民有言論、出版、集會、結社 kap 遊行示威 ê 自由！
3. 廢止人民團體組織條例，取消報紙雜誌登記制度！
4. 解散政治、經濟 ê 秘密警察 kap 所有 ê 特務機關！
5. 拍倒貪官污吏 kap 影響政策 ê 惡質好額政客！
6. 拍倒官僚資本 kap 沒收利用特權無正當得著 ê 橫財！
7. 反對帝國主義 ê 侵略，趕出美國 ê 勢力！
8. 反對美國 tī 台灣建設軍事基地，趕出 tī 台灣 ê 日本人！
9. 反對美國培養日本 ê 獨裁專制勢力！反對進口日本貨！
10. 反對反動派(國民黨) tī 台灣訓練新兵！反對徵兵！
11. 反對抽無合理 ê 雜稅 kap 反對徵收糧食！
12. 反對統制經濟，廢止霸佔貿易，取消公賣局！
13. 減少田賦租，保護農民 ê 利益！
14. 發展工商業，反對美國 ê 經濟侵略！
15. 反對剝奪人民財產 ê 金融制度，藏黃金 kap 美金，m̄-thang 交 hò 反動派！
16. 反對獨裁專制方式 ê 教育，趕走特務！
17. 尊重學術自由，承認學生 ê 自治！
18. 擁護 Cairo(開羅)宣言 kap Potsdam(波茨坦) 宣言，反對「託管」kap「獨立」！
19. 擁護新政治協定，民主方式 ê 聯合政府！
20. 全省台灣人民團結，達成台灣自治！
21. 全省人民 kap 全國人民聯合起來！
22. 中國人民萬歲！
23. 台灣人民自治萬歲！

事實國民政府管台灣有 15 冬，管 kah tiâu-tiâu-tiâu。面頂所講 ê 政治目標是空殼無內容，無一項有實行。中共 mā teh 管 in 所解放 ê 地區，tī hia-ê 地區中共敢正實有實行幾項面頂所講 ê 政治目標？總是咱 ài 承認謝雪紅 kap 台盟 ê 勇氣 kap 熱情。

莊嘉農寫 ê 《憤怒 ê 台灣》(1949 年 3 月香港智源書局出版) kā 謝雪紅 kap 台盟 ê 組織叫作「統一戰線」ê 核心。伊有刊講：「二·二八事件有留一個教訓 hō 台灣人。彼個教訓 tō 是若是無利用一個真強 ê 統一戰線來團結各層 ê 革命勢力，無法度 chham 共同 ê 敵人相拚，會 tī 半中途 hông 拍 kah 散離離。所以二·二八事件以後革命者上蓋重要 ê 任務是建立統一戰線。」

1949 年 11 月 12 日《香港華商報》有刊台北通信講：「台灣民主自治同盟籌備會 tī 國父孫中山生日彼日，tī 台灣省北部某所在開第一次會員代表會議，議會通過綱領規程草案 kap 發表政治要求 ê 聲明書。聽人講台灣民主自治同盟 ê 目的是 beh 團結全台灣省 ê 人，爭取台灣省 ê 自治 kap 建設全中國人民民主聯合政府。台灣民主自治同盟希望台灣省內外各地，會 tàng 趕緊開始有組織 ê 活動。」

莊嘉農講台灣民主自治同盟正式成立 ê 日期大概 á 今年年底。伊刊二·二八事件 ê 教訓是 11 月 20 日。總是無論如何，tùi 1948 年初香港左派 ê 報紙 kap 雜誌有增加刊「台盟」ê 聲明 kap 宣傳記事。

台盟發表 18 條政策 ê 第 1 條「建立民主聯合政府」真可能是根據毛澤東 1945 年 ê 「聯合政府論」。第 2 條以下，除了第 8 條 kap 第 9 條，攏是有關台灣自治 ê 主張。這款現代化 ê 地方自治 bē 受著現此時中共 ê 歡迎，m̄-kú 1949 年 3 月 8 日 ê 《解放日報》有刊「中共 20 外冬鬪爭 ê 目標 mā 是相像地方自治。」「台盟」看著這個記事，大膽起來，siuⁿ 過份主張地方自治。「台盟」m̄-niā 無受著中共 ê 歡迎，顛倒刺激著國民黨 koh 加嚴格控制台灣，tī 短期間結束二·二八事件，所以「台盟」犯著中共 ê 期待。二·二八事件以後成立 ê 「台盟」m̄-niā bē-tàng tī 台灣生存，hông 趕出台灣走去香港、上海。魚仔 tī 水底才會活，tī 陸上 tō bē-tàng 生存。Che 是中共無 kah 意「台盟」ê 原因。而且二·二八事件以後台灣人 ê 心理 m̄-niā 無想 beh 倚中共，顛倒恨 siâu 中國人，甘願 beh 台灣獨立。中共 lú 來 lú bē 信用台灣，認定「台盟」無路用。「台盟」mā 是認定中共 ê 獨裁中央集權制無稀罕，所以勇敢反抗中共。「台盟」ê 幹部江文也看破中共講：「共產黨無能管台灣，台灣需要真 kôan ê 地方自治。」「若是共產黨解放台灣，會 koh 再發生二·二八事件。」當然 in 一人一人 hông 清算，謝雪紅是上蓋續尾才 hông 清算，chū 按呢「台盟」tō 滅亡。

咱現此時用真複雜 ê 心理 kā 「台盟」khioh 骨。台灣人 ê 骨姑不將 tō ài hō 台灣人 khioh。M̄-kú 倚國民黨 ê 台灣人可能會認定 he 是共匪走狗 ê 續尾 chham in 無關係。若是按呢，盡忠共產黨 ê 黨員敢會為伊傷心？He 是真有疑問 ê。看共產國家對待 Stalin(史達林)過身了後 ê 處理，免講 mā 會知，in 是無情 ê 社會。干單咱台灣人認定謝雪紅 kap

「台盟」是有骨氣 ê 革命者，o-ló in ê 勇敢 kap 熱情。過去我 bat chham 一個共產主義 ê 人交換意見。「可比咱 beh peh 玉山，會 tàng tuì 阿里山 peh，mā 會 tàng tuì 埔里 peh。為著台灣人 ê 幸福，你 teh 行中共路線，我 teh 行獨立路線。咱互相了解各人 ê 立場，尊重各人 ê 人格，互相加油。」伊真氣講 he 是無可能。我想若是謝雪紅 kap「台盟」ê 人會 tàng 笑笑 á 接受。彼個人無歡喜 ê 原因可能是我講一句為著台灣人幸福，m̄-kú 我是台灣人，m̄ 是中國人，我 bē-tàng 為著中國人 ê 幸福犧牲台灣人。日本人敢會為著美國人 ê 幸福犧牲日本人？M̄-kú 國民黨 kap 共產黨攏講台灣人是中國人，所以 ài 為著中國人 ê 幸福拍拚。Beh 作台灣人抑是中國人是各人 ài 家已決定 ê 代誌，國民黨 kap 共產黨 m̄ 免鷄婆替台灣人決定。這個問題 m̄ 是我家已 ê 問題，是 900 萬人各人 ê 認定，ài 靠人民投票來決定。我相信至少謝雪紅 kap「台盟」會投 chham 我相像 ê 票。

將來 m̄ 知影台灣人會按怎批評謝雪紅 kap「台盟」，m̄-kú 咱 ài kā in 體念 in 行 in 所信 ê 路。政治家為著行家已所信 ê 路，犧牲家已 ê 生命是真高貴 ê 代誌。有人會為著行錯誤 ê 路，害著家已，m̄-kú m̄-thang kā in 當作 in 是這款人。In ê 功勞 tō 是 kā 中共教示，台灣人無彼呢簡單 tō 會 tàng hông 喝 khiā tō khiā，喝坐 tō 坐。

Chham 謝雪紅 kap「台盟」比較，真可惜有真 chē 台灣人 teh 害台灣，想著真傷心。

二・二八事件發生前 ê 小暴亂

苑裡是 tī 海外線通霄 kap 大甲 ê 中間，人口 3 萬人 ê 小所在。彼當時苑裡猶有日本憲隊駐在，所以時間上應該是第二次世界大戰結束了無外久。戰後經濟統制解除了後，苑裡 chham 中國大陸 ê 走私貿易真興旺，所以台灣全島欠糧食欠著真嚴重。苑裡特別欠，m̄-kú m̄ 知影為啥物原因苑裡會特別欠，鎮民暝日拍拚爭取糧食，對爭取糧食 ê 消息真敏感。

鎮民有聽著風聲，講農會合作社有存真 chē 政府 ê 糙米，向鎮長陳南輝請願放領。陳南輝向新竹縣長劉啓光請示，縣長拖無 beh 批准，鎮民 bē 等得，拍鎮長 kap 走狗政客，搬米出來分配。劉啓光得著報告馬上派一班兵坐巴士去鎮壓。巴士開到苑裡馬上 hō 鎮民圍起來解除武裝。劉啓光 koh 再派救兵成功鎮壓。好佳哉，這個事件 tī 二・二八事件前發生，hông 掠去 ê 鎮民無外久 tō hông 放出來。Tui 這個事件咱會 tàng 來 ioh，親像這款事件 tī 全島各所在真普遍發生。

二・二八事件美國 ê 報告

1949 年 8 月，美國國務院發表中國白皮書，指點國民政府 ê 失敗 kap 腐敗。彼個白皮書包涵附件攏總有 1054 頁，是一件真大 ê 文書。有關指點台灣 ê 部分用 8 號印刷字體有 13 頁 ê 報告。美國政府二・二八事件 ê 報告 tō 是 tī 這本白皮書 ê 內底：United States Relation With China, With Special Reference to the Period 1944~1949 U. S. Dept. of State Publication 3573, Released August 1949, pp. 926~938。

這本白皮書是 1949 年 4 月 18 日美國駐華大使 Stewart 親手交 hō 蔣介石 ê 「台灣局勢 ê 備忘錄」，後來編入去白皮書。

若是有讀著白皮書 tō 會知影 Stewart 大使雖然是干單報告 tī 台北所發生 ê 代誌，m-kú 國民政府軍隊烏白拍死人 ê 悽慘代誌，內面有真詳細 ê 報告。彼當時美國 ê 政策是為著希望國民政府拍贏中共，美國提供國民政府真 chē 軍事 kap 經濟援助。本來 tī 國務院 Stewart 大使真敢攻擊中國，但是 tī 報告內面伊有讓手，m 敢攻擊無人道 ê 蔣介石國民政府。雖然白皮書描寫二・二八事件相當正確，但是對這個事件 ê 根本性質 kap 歷史上 ê 意義有無公平偏倚國民政府 ê 所在。Stewart 大使有提出伊對二・二八事件事後處理 ê 意見，伊相當同情台灣人，m-kú 真明顯，伊 ê 目的 tō 是暗示國民政府用上蓋節省 ê 方法統治台灣，(減少軍事 kap 經濟援助 ê 開銷)。